



Леккара
уталтыйс,
хул ведман
рупитас

Хор: Вениамин Горяев

4»

Хул ведпаслаты ёх емаң хатд

РЫБАЦКИЕ БУДНИ



№ 1. Капитан комсомольско-молодежного судна базы морского промысла «Самум» Анатлий Олонин.




№ 2. Рыбак совхоза «Россия» Ламдо Сакку. Его сети всегда с уловом. Иногда только за одну ночь Ламдо Сакку добывает по сто килограммов сельди.

№ 3. Далеко в Обской губе ведут промысел рыбы суда базы морского промысла. На снимке вы видите один из рабочих моментов на судне.

№ 4. Далекая Халмер-Яха. Зимой здесь ловят рыбу промысловники почти всех рыбоучастков Тазовского комбината. Отсюда, уловившая в мешки, рыба самолетом доставляется в Тазовское.

№ 5. «Оленевод», «Чумикан», «Сопочный» — крупные, вместительностью на многие десятки тонн, рефрижераторы, ведущие приему рыбы от судов базы морского промысла в Обской губе. На снимке вы видите суда базы у рефрижератора.

№ 6. Бороздат глады «голубой целины» мотобударри. Время от времени они подходят к плашкоуту. Рыбаки сдают угор. Этот момент вы и видите на фотоснимке.



6 стр.

7 стр.

1965-мет тадан «Красный Север» газетайн хул ведпаслаты ёх емаң хатд элты мет олаң хораң айкел понтса.

Там емаң хатд кашң тад хоятатан лавалда. Луң рупитты сус емаң хатадан туп уйтантыты рахал. Кум шитман мойң хоятат ведпаслаты паната яңхлат па хул велты ёх пилан уйтантылат. Хоты ши емаң хатд этас там лопасан еша айкел тулуд.

Хул моцатты ёх емаң хатд Мурманск вош элты постаты питса. Щита хул ведпаслаты «Мезень» нәмпи ун тутаң хоп мет олаң пуш ущ тылащ 21-мет хатадан 1920-мет тадан щарса этас. Ветъяң педа няд тал хащаман, Мурманск ведпаслаты ёх лув емаң хатлэд ши этам тутаң хоп кеша постасэл. Елды па кимет тадан хул ведпаслаты емаң хатд Советской союз доватан постаты питса. 1965-мет тал элты уйт дор тылащ кимет лапат

ох хатадан постада. Тампуш емаң хатд уйт дор тылащ 12-мет хатда хойд.

Ямал мувеван хул ведпаслаты ёх емаң хатд кашң районан постада. Ши хатадан мет каркам па хув рупитты ёх мойдаптадайт. Округев доватан мет олаңмет пуш хул велты ёх емаң хатд уйт дор тылащ 11-мет хатадан 1965-мет талд постаса. Ши хатд элты «Красный Север» нәмпи газетайн ханшса. Этам лопасал хулам пуш аршака этсат. Ад порайн туп 4 лопас, емаң хатд кеша 12 лопас верса. Кашң лопасан ведпаслаты ёх хорат па лув элтайл ханшам потрат понман усат.

Там щутцаты хатдтан емаң хатд Ямал мувев доватан постада. Охсарвош, Харсойм, Белооярск, Катравош, Зелёный Яр па Канац

Похал куртатан Кев сыд районан улты хул велты ёх уйт дор тылащ 11-мет хатадан уйтантысат. Ици хатадан Надымской, Ямальской, Тазовской па Красноселькупской районатан велпасыты ёх хоща мойң хоятат ёхтыдысат.

Дорвош районан сельхозпредприятие «Мужевское» хоща рупитты ёх кеша уйт дор тылащ 6-мет хатадан емаң хатд лэщатыса. «Горковский» рыбозавод 10-мет хатадан Дорвош емаң дор пуңадан емаң хатлэд постасэл. Кимет лапат олаң хатадан сельхозпредприятие «Горковское» хоща велпасыты хоятат Хашкуртан ияха актащдат. Хоты емаң хатд постаса кимет лапатан луңтаты.

Иван Сандрин ханшам потар

Ялпитам верат этлат

Щёхар тыдась олаңмет хатд элты хул ведпаслаты ёх ураңан ялпитам верат лэсаят. Си онтасан шоши мир хоятата хул кеншака мосятыты питал. Хой Единой реестр хося лоңадман уд, 2027-мет тал элты симась нэпек верты ант мосал.

Тамась верат округ хуват хул ведпаслаты хоятат ураңан верман улдат. Хой холна симась нэпек ант лэсаят, «Госуслуги» хуват китты верытад па МФЦ хотан верты.

Шоши мир хоятат, хойтат Единой реестра доңадман ант улдат, 2027-мет тал хул мосятыты заявка нэпек унт дор тыдась хольмаң педа ветмет хатд унты куртан

улты утхотан ханшты мосал. Холна округ агропромышленной комплекс департамента щёхар тыдась олаңмет хатд унты почта хуват китты рахал. Хой си хатд юпийн китал, нэпеклад ант вантлайт па квотайн ант мадайт.

Альбина Тырлина ханшам потар

Москва вошан верам поры

Хон муеван, уйт дор тыдащ нийдмет хатл Хоттэд хоят хатла постаман ул. Ши хатадан ар тал яха улам па няврэмлал вещката энмалтам хоттэд мохет мойдаптадайт.

Там порайн ялап щират этсат, яха ханшлтантыты мохет хорам каншман, лув пирым тахаелан ёш пос понты верытлат. Хой ши кеша Кев доңла нох хуңхлат, еңк хот лыпия ил охалдат, ур хота, муй па щарас пела мандат, карты кешең патинкайн еңк хуват хатмилат.

Овс мув шимлаң рут мир хоятлуд па поры щир эталтаты ураңан, Хон муев волаң воша вохдайт. Тампуш «Россия» нэмпи национальной центрар арсыр рут мир айлат ёх яха ханшлтантылат. Лув кутэлан



Хор: Антон Русмиленко

хулам ханты хоттэд пил. Владимир Сопочин па Арина Колыванова, Георгий Кунин па Диана Плисова Ёмвош округ элты ёхтыдысат. Там няврэмат ар няврэмаң хоттэдатан

сэма питсат. Опрацлал йис тэлан вулэт шавиман, вой па худ велпасламан усат. Ханты улапсаел елды тувман, айлат ёх энмам куртлалан улты па щитарупитты номас понтсат.

Ямал муев элты ёш пос понты Москва воша Антон Русмиленко Виктория Юрко пил туты нэңал пилан яңхас. Антон Дорвош район Горка вошан сэма питас. Щита энмас па ашкулдайн угалтыйс. Ханты улапса верата ащелан угалтаса. Виктория па руц эви.

«Мин ищи ар няврэмаң хоттэдатан энамсаман. Ай тэлан рут мир улапсаеман шавиман тайты угалтасайман. Ин мин Пулңаватан улдаман па щитарупитламан.

Номас тайдаман, ун хот омасты, няврэмламан энмалты па кат мир рут хоятлуд пилан уйтантыты», – Антон па Виктория ястасқан.

Зоя Куртямова ханшам потар

Хон Петра воша яңхам ханты эвие

Ашкулдайн яма угалтыты няврэмат, мой-лапса юкана, арсыр вошат вантты па уйтантопсаята тутгылдайт. Йи тамац емаң хатл кашң тал Хон Петра вошан лэщатыла. Хон муев хуват ихощъяңмет класс «вет» па «нял» поса етшам няврэмата катра пора хорпи вурты паршаң катер эталтала.

Ямал муев элты эвет, похат ищи тохи яңхасат. Хольмаң пела кат няврэм кутан Ващъёханов курт элты йи ханты эвие ус. Щит Татьяна Петровна Озелова. Ащел – Пётр Николаевич, «Ямалком-мунэнерго» тахайн карты аймтты хоята ул. Аңкел – Людмила Валерьевна, лапка нэңа рупитал. Хулам няврэм тайлаңан, лув кутэлан Татьяна мет ун.

Ашкулдайн угалтымалаң, ханты эвиев арсыр касапсайт, олимпиадайт па хоятата нётты верат хоца

пилтащилдыйс. Нэмолты порайн пуңалан ант дойс. Аңкеда-ащела па ащилала ищи иса нётас.

«Хун ма тамац айкедан ёхатсайм, шеңк аматсам. Кашң эви па пох нумасыйл вурты паршаң хоп ванттыя яңхты. Туп ши кеша шеңк ар юр угалтыты вера понты мосал. Округ элты ёхтамы эвет-похат пилан каматса ун хоят ус. Кашң хоят Нева ёхан хоца ванапак манты лаңхаса. Ар хоят кутан лап ант тапалты ураңан, муң тохи ант эсалсаюв, ёхан яма ныты палшак тахая тусаюв.

Турам пела хорам ольпаң тутат эсалсайт, хус иты верам соткем арат нови тутат элты актамы хорат эталтасайт. Ар хоят потарты шув кутан, хорам арэт арыгы сый яма цацас. Имомлтын тутаң, вурты паршаң хоп муң ещалтэв ши этас. Ун, хорам, умац вантты.

Угалтыты няврэмат пилан рупитты хоятата ун пумащипа

ясаң ястаты утцидам. Тамац уйтантопса нэмолты порайн ант ёрэмалэм. Щита ма ялап духсат уйтсам, ям хоятат пилан пилтащсам. Щаль туп, ашкулдайн угалтыты етшасам. Кум шитман, тамац уйтантопсая, ма дулан ипуш па яңхсам», – ихощъяңмет класс етшам эви Татьяна Озелова ястас.

Хуламхощъяң няврэм па Москва воша тутгысайт. Тохи Андрей

Свалов яңхас. Лув ищи Ващъёханов ашкулдайн угалтыйс.

Ашкулдайн угалтыты няврэмата ястаты утцилуд, яма угалтыты, ялап вер верты ал падагы. Ши порайн, елды манты юшлан кентат пуншатлат, хува манлат. Куш ай куртан, куш ун вошан угалтылты, хоят лув нэмал елды лув ши тулды.

Зоя Куртямова ханшам потар



Хор: Татьяна Озелова

Информация об общем объеме бесплатной печатной площади, предоставляемой печатными изданиями для проведения предвыборной агитации выборов депутатов Государственной Думы Федерального Собрания Российской Федерации девятого созыва

Общий объем бесплатных полос в общественно-политической, национальной газете «ЛУХ АВТ», предоставляемых для проведения предвыборной агитаций по выборам депутатов Государственной Думы Федерального Собрания Российской Федерации девятого созыва, – 4 полосы А3 (3800 см²).

Информация об общем объеме платной печатной площади, предоставляемой печатными изданиями для проведения предвыборной агитации выборов депутатов Государственной Думы Федерального Собрания Российской Федерации девятого созыва

Общий объем платных полос в общественно-политической, национальной газете «ЛУХ АВТ», предоставляемых для проведения предвыборной агитаций по выборам депутатов Государственной Думы Федерального Собрания Российской Федерации девятого созыва, – 4 полосы А3 (3800 см²).

Информация об общем объеме бесплатной печатной площади, предоставляемой печатными изданиями для проведения предвыборной агитации выборов депутатов Тюменской областной Думы восьмого созыва

Общий объем бесплатных полос в общественно-политической, национальной газете «ЛУХ АВТ», предоставляемых для проведения предвыборной агитаций по выборам депутатов Тюменской областной Думы восьмого созыва, – 4 полосы А3 (3800 см²).

Информация об общем объеме платной печатной площади, предоставляемой печатными изданиями для проведения предвыборной агитации выборов депутатов Тюменской областной Думы восьмого созыва

Общий объем платных полос в общественно-политической, национальной газете «ЛУХ АВТ», предоставляемых для проведения предвыборной агитаций по выборам депутатов Тюменской областной Думы восьмого созыва, – 4 полосы А3 (3800 см²).

Щалиты па савиты рот ясцув

Саранск васна III Международной конференцияна пал йитпи эвалт Международной ёң тал ясаң коренной нэңхэт сый хорпи нэм таяс: «Всемирной сокровищница рот яснат: щалитты па омщаламан». Харам? Сэңк! Ор хат эвалт нейросеть хоща: хоты искусственной интеллект ханты ясаң нятты номас таял.

Ор хат эвалт нейросеть хоща: хоты искусственной интеллект ханты ясаң нятты номас таял. Там яснат юпина – вул вер верта масал. Ходна хунты школайна ропитдан, кадаң нявремдан пилна ханты ясаң елась тулэн. Щи нявремат ощдат, кадаң топ ал аңтаң па пунаң вай хунты! Лув лохас, тотлилды, лапатдалды, соматдалды, щалитдалды! Топ тампус энамты нявремиеет лув рот ясцел ярематы питсэл! Сэңк шаль! Тохал ханты яснат рушь ясаңи лавта питсэл! Ханты ясаң щит ёраң па тащаң! Камн арат кадаң нэм таял! Щитна ма и вул номас вусам: нейросеть вахта масал. Щи нейросеть муңев ат нятл, хоты хантэт кадаңдал нэматдал? Лув нях щирна па хорпи яснат лавта питас! Щалта нявремат номаста питсат, ащем па амэм щиты кадаңдув хунт алщидаят. Нявремиеет хата антам яснат каста питсат! Ханты словарь парта кератты питсэл! Мала кем урок юпина, ванлэм ма онтаты нявремиеям щи арат ханты яснат ощмел! Аса ханты ясаңна потарты питсат! Хоты ядан кадаңдал пилна олдат, хота кадаң ёсат тайлат, мала луңан па талан амыдал



Ольга Пандо па Татьяна Шевяхова конференция яңхсаңан.



Хор: Ольга Пандо

па ащидал вердат. Вул вер щи версув! Ясаң топ нэпекна хунт ол, ясаң дыл таял, хата нэңхэт потарлат. Щи искусственной

интеллект лавты хорпи – рот ясцэв ат хув ол! Ходна муң ханты нэңхув Роман Ругин щи ямас лавилдыяс:

«Ма ясцем ёраң па тащаң Сарайна хун хадад лув Хой лавам ма ясцем касаң Ищимет хохаалтам сув!..»

Тампус касң нявремат пилна онтыты нэңхы щиты ки ропитл, хоты муң ханты нявремдув рот ясцел ямас па туңа щира ощсэл! Топ ант йидап технологияйт эвалт палта ант масл. Луват дылаң ясаң хун парта пелатла. Топ рот ясаң нявремат ощип питлэл!

Щи конференцияна муң округ эвалт Татьяна Шевяхова ищи яңхас. Лув потар верас, хоты округвна мала арат нэпек рушь ясаң эвалт ханты па ор яснат эвалт хансман олдат. Щи нэпекат школаятна китсаят. Няврематна сэңк омщалаят. Нэпекат хорамат, альпаңат, рахал ханты па ор ясаңна луңатта!

Ольга Пандо хансам потар

ОБЪЯВЛЕНИЕ

Там QR-код хуват лоңаты па вантаты, муйсыр нётопсайт СВО хоща улты мохета мадайт. Щи тумпийн нэңдала, няврэмдала, аңкидала па ащидала ищи нётопса вуты рахал.



СЛУЖБА ПО КОНТРАКТУ В ВС РФ

ПОЛНАЯ ИНФОРМАЦИЯ ПО ТЕЛЕФОНУ
+7 (902) 816-11-90
+7 (34922) 3-98-08
ЗВОНОК ПО РОССИИ БЕСПЛАТНЫЙ

ВРЕМЯ ДЛЯ ВАЖНЫХ РЕШЕНИЙ!

КОНТРАКТНАЯ СЛУЖБА
6 700 000 Р
ЕДИНОВРЕМЕННАЯ ВЫПЛАТА
4 000 000 Р

ПРИ ЗАКЛЮЧЕНИИ КОНТРАКТА НА ЯМАЛЕ

Прибывающие из других регионов возмещаются затраты на проезд от места проживания до г. Салавара. В период оформления проживания в г. Салавара и 3-разовое питание предоставляется бесплатно.

ОБУЧЕНИЕ:

- ✓ ОПЕРАТОРОВ БЕСПЛОТНЫХ ЛЕТАТЕЛЬНЫХ АППАРАТОВ
- ✓ ТАКТИЧЕСКАЯ БОЕВАЯ
- ✓ МЕДИЦИНСКАЯ ПОДГОТОВКА

3 600 000 Р ЕЖЕМЕСЯЧНЫЕ ВЫПЛАТЫ ПРИ НАХОЖДЕНИИ В ЗОНЕ СВО
400 000 Р ИЛИ ЕДИНОВРЕМЕННАЯ ВЫПЛАТА ДО 120 000 Р

ОТ 225 Т. Р

Сорашак айкед мощатты ураңан

«Лух Авт» газета кашң лапат йи пуш этлдыйл. Тухал ишан, ёхаттал унты тадаң лапат хащал. Щи веран, сорашак айкедат мощатты ураңан, нынан мосал «Лух Авт» поныдыты айкедат «ВКонтакте» па «Одноклассники» хоща мощаттыты.

Щи ураңан там QR-код мохты лоңаты, па муң верыдыты айкедлува ханшдтыяты. Кимет веран, айкед луңатты тумпийн, щита рахал ясаң ханшты, потран сама ки рахас – пос понты.

Муң па, нын вантам айкедлан элты ищи нопсэв тыел-тохел поныдылэв, вантлэв – мата айкедат па муй элты хоятат луңатты лаңхалат.

Тумтак ёшна, тумтак курна ханты мир улапсаев ияха понасман елды тулэв, ханты мир ясцэв шавилэв!



Леккара уталтыйс, хул велман рупитас

Николай Носкин ар няврэм тайты хоттэдан 1956-мет талдан Посад ов куртан сэма питас. Опрашлад тал порайн Мойёхтас куртан усат, то-вийн Ас педа касдыдысат па ур хот донцидысат. Сусан, ищки хатлат ёхаттыйн, ёхды маньдысат. Хун ун ащел Проконий Иванович, луң улты тахайн ялап паварт хот омпас, хоттэл хоятлад иса тохи туслы. Хорам па хулаң куртыел Посад ова айлты питсэл.

Посад ов ям, хулаң тахайн, Ай Ас ям пелакан дойл. Кеваң дор, Ильякурт, Овакурт элты хоятат велпаслаты ёхтыдысат па ищи хотат омасты питсат. Щиты куртыел уна йис: ай леккар хот, дапка, нянь верты па худ шавиты таха верса.

– Ма ащем иты ай пора элты худ велты нётсам. Нумлэм лув ялап «Казанка» хоп па «Стрела» мотор лутас. Щитан муң ношталты мантсув па уншак икет потарсат: «Щерки Носкин мотуран яңхал па худ пакнаптад», – нумадмиман Николай Сергеевич ястас. – 1964-мет талдан ма Асов ашкудая тусайм па щита нийл тал уталтысам. Ашкудла юпийн, Пулцават воша елды уталтыты леккар педа мантсам. Щита уталтыман Акулина Тимофеевна Пугурчина пидан уйтантсам.

– Уталтыты етшам юпийн пиднэнем Дорвоша рупиты китса, ма па Аншикурта партсайм. Еша рупитсам, хус тал довата йисам. Товия йис, солтана манты пора ёхтас, Мужи воша шушмасам. Портундам леккар хота маслам па военкомата Виталий Демьянович Марников хоша ёхатсам. Солтана ханшлгасайм, – Николай Носкин елды потарты питас. – Акулина пиднэнема айкед туты Дорвоша тохлаң

Дорвош районан ар ошаң, юраң па каркам худ велпаслаты хоятат улдат. Хув па ар рупитам ёх кутан Николай Сергеевич Носкин, лув велпаслаты рупатайлд шеңк самаңа тайлалды. Нялъяң молтас тал Горковской рыбозаводан рупитас.

хопан мантсам. Длапат усам па ёхды манты тохлаң хопем ант ёхтас. Солтана манты ищипа мосас. Дорвошаң айлат ху Яков Хартаганов пидан Мужи вош педа шушмасман. Ёханов унты куран ёхатсаман, елды па доваң ухадан тусайман.

Николай Сергеевич солтан вер щиран Казахстан муван Державинск вошан ус. Олңа комендантской часть хоша, щалта па строительной батальон хоша рупитас. Пора сора хащас, 1978-мет талдан ёхи ёхтас.

– Мужи воша ёхатман военкомата доңтысам, ким этсам па уйтты турсый худсам. Аңкармасам, самаңа тайты эви-ем тата хухалад, – няхилдыман Николай потартал. – Нох аматман ападмисэм, мослтасэм. Асова ияха мантсаман.

Николай Мужи вош леккар хота уталтыйм щир рупата каншты яңхас. Туп дипломал уштамал. Щи нэпекды рупата-ая ант вуса. Нох дэщатты Пулцавта яңхты партылыса.

– Ма ант мантсам, – ястас Николай Сергеевич. – Щи порайн худ велман яма рупитман худам сот солкува ёша паватты рахас. Велпаслаты ай пора элты хошлам. Щишан щи рупатаем такан тайты питсэм. Щи порайн, хой яма велпасас, яма па тэлаңа усат. Щиты ма атаң-хатл рупитсам, хатл сыс хулам-нял щёс туп олсам.

Йи талдан план щиран 10-12 тонна худ мошлатты мосас. Айлат ху Николай кат пуш аршак мошлатыйс, хой порайн 30

тонна педа ёхтылдыс. Хул артан хойты порайн, алаңсахат холап вантман 300 кила сарах туп хойлдыс, ет-найн валэмаман – холна 200 кила. Аратал тонна шупалд йи хатадан. Щёхар, мохсаң па вунш щи порайн артан хойлдыс. Иса лашкупа мийдыслад. Мет тынаң худ – сух – порайн ёхи тутдысэл. Йи пуш кат метра молтас хуватпи вунш мошлатсат, хопа ператты ант верытсэл, кедан ярсэд па щиты патан каднаң унты талдсэл.

Рупата яма манас, катңан мис па каматса дов лутсаңан. Шитам охлад ияха акатман, Николай донщхоп лутты яңхас. Пулцават «Ямалрыба» предприятие элты «Буран» мошлатас.

– 80-мет талдан ям пора ус. Хой яма самаңа рупитас, щит муй лувела мосас иса лутты верытас. Хой мотурат, хопат па донщхопат лутыдысат. Машина ищи лутты рахас. Ям юш щи порайн антом, – велпаслаты хоятэв няхилдыйл. – Тал сыс рахас ох акатты па «Буран» лутты. Щи порайн лув кат щёрас солкува тынал ус.

Яма велпаслаты ураңна Николай Носкин райком комсомол хоша ханшлгтаса, щалта па партияя уса, конференцияята китыдыса. Рыбозавод элты хот верты ёх Посад ов куртан каматса ялап хот омассат.

– Улапса щиран иса ям ус, роман вевтам пора ёхтас, – Ни-



Хор: Вениамин Горьев

колай Носкин нумадмийс. – Иса налог маты мосты питас. Щишан мислам, довлдам па ошдам нох хорсалдам. Рупатаев элты па ох маты ант питса, туп лант па саккар мийдыса. Шай па мис вой антом. Айнайн улапса кенашак йис. Щимащ даварт тал порайт усат.

Яма па самаңа рупитам ураңна, 2002-мет талдан Николай Сергеевич рыбозавод элты «Буран» нэмпи донщхопан мойдаса. Кимет талдан па планал тэкап-таты ураңна премия юкана ялап «Тайга» донщхопан маса. Щи кат дохпи донщхопад ин там хатл унты холна тайлалды.

Улман хуват ийимелд пидан няврэм ант тайсаңан, каматса хилылад энмалсаңан. Ин лув уна йисат па Овкуртан улдат. Акулина Тимофеевна 2008-мет талдан антома йис.

2009-мет талдан Николай Носкин Заслуженной работник рыбного хозяйства Российской Федерации Владимир Путин Хон мувев кушайн мет ун мойлапсайн па тынаң нэман юкантса. Щи юпийн лув холна яңкем тал рупитас па пенсияя этас. Ин лув Посад ов шоши куртадан елды ул па щутцийл, холпал вантман, лэты кем арат худ мошлатыйл.

Тампуш, ун кер тылащ 9-мет хатадан Николай Сергеевич 70-мет тадал постас. Хул велпаслаты ёх емаң хатадан ям ясаңан китлэв, елды щи кемадан тумтака ат ул!

Иван Сандрин
ханшам потар



Хор: Светлана Носкина

Овс мувева луң пора ёхтас. Лув ван, туп шеңк ольпаң. Каман хошам па найң хатлат дойлат. Мувев, юхлудв хорамана йисат. Кашң дыштэв, кашң юхев лув хорам тайл. Там лопасан няврэмат ураңан потар амаматсет па инсясапсайт дэсятсув. Артадалув, муй Овс мувеван энамты юхат элты уютлаты.

Хорам Овс мувиев

Амаматсет

Худ юх элты йинтпийидам хувшак.
Нохды туңа мандам.
Хар тахайн дойдам ки,
Нувдам юх тайн энамлат.

(хои ишнл)

Товийн лув ялпилдыл,
Нови охшам поныдыл.
Пора ёхатты порайн,
Эплаң юшал ларпилдыл.
Энмам вонсяпсайдал элты
Иса питыя лув йил.

(хои моил)



Русь хораман эвие
Хар тахайн дойл.
Нови сарапанан,
Восты хоптанийн.

(двмлс)

Нохар юх па худ
юх хорпи.
Тадан йинтпат туп
ант тайл.

(янвн)

Нэмолтыйн лув
ант палтаптада,
Туп лув иса тарыйл.

(хои пох)




Хор: Альбина Тырлина



Потар вера

Унтан улты войт луң-сус сыс энамты
вонсямот, толах, нохар дэлат. Там хорат
хуват потар дэсятаты па ёхды ястаты.

Йи молты порайн даңкие унт хуват навар-
ман, волаң нохар юх шики шиялас. Си елпийн
лув си арат нохар ант вантыдылс. Мохты
сопаслаты питас. Йи отдал улты хотала
туслы, кимет отдал улты юхал идпийн
ханятсалды. Си арат дэсятас, хув
иськи тала тарамла.



Муй юх, моштаты

Там хорат хося муй хорпи юхат
эталдыман улдат, моштаты. Муй
хорпи лув дыштат, мосаң дэпас
тайлат, ястаты.



Унтэва нётапса

Луң сыс куртаң няврэмат унта сютсаты, ёхана певалты яңхлат. Сита тут понлат. Хоты нын унтэва нётты верытлаты: йиңк йинсьгы кеванат, мавнянь элты хасям нэпекат, саккараң дэтот хошапат нулама ад воськияты, ад ситы лыштат ад маншияты, юх нуват ад шукататы.

Унтэв сыстама тайлэв ки, лув мет хорамана йил: юх, дыпат, вонсямот аршак энамал. Унта ёхтыдыты хоятата, юхан сыстаптам дыл шуван кеншак дадты, щицкет сый худантман, сыстам унт хуват каш яңхты питал.

Дэваса тут ад понаты! Тут понман хурман удаты, ёхи манты елпийн, ратхар япсыена йиңкан лап шошмадан.

Шөпэрқи



(Олаң шупал № 27 луңталн)

Панэ қөтөң әвөл ту ими, ти ылэ выхэл, нэврәмэх, қот лэхпийа. Йәқә ләң. Панэ төт вёл, вёл. Мөнтахә йәхмала панэ ту қөнә ти катләмты. Ту қө, әнта, ылэ қәһимтәхәл. Ту нэнат һул тәхтәхә йәккән. Ту нәнә ылнам йәвәтлј, төт нөқ лүльәмтәл. Өс қөнә ту нә ылнам йәвәтлј. Ту қө панә вөвәл қөл. Әй латнә ти льһтәмтәх: «Тәқа, тәм нә тәнә ләйхәл, ма өлән ту нә ылэ тәхиптахә». Вәлэ өвтыя вөв сохит рәвиптәх панә төвөнә льһтәмтәх: «Ит тәнә ныңәт қуй йах киһта вөккәнәт, тәл илэ лирты питтә нәңи пәқит, пәв пәқит өс мүвәли пә вәрәнтәләт. Өлән өс лирты питтә йах, нә чымләли әй вәртә лаңки чөп ким қө киһта вөвләхчәк вөл». Панә ту нә көтәла тә пит. Панә йәқәнам ти тувтәх.

Ту йәқә йөвәтмина... йәқән пә өнтә вөлхән, әнта қөл вөлхән... кәк қот, вәқ қот вәрхән. Панә төт вәлтахә йәккән. Әй латнә ту әнәлпи ләлил кәм ливәт. Панә ләйләл, иттән, тұлхин. Йәқә ләң панә атилнам йәстәл:

– Йа, нүң ати, Төрәм Қон вөсән. Панә мүват тәнә? Төм айпи маһәмнә, қотнам әңкрәмтәм, кәр турпахәл нум вәха мата ныйәл, най һалмәт килаләт. Мәң турпа төйәв әңкрәмтәм, әлэ қуй амп ләх төйәли рәвисләли вотнә, панә нөқ әнтә йәмхә вәтәхләл. Нөқнам тули, әй төт қот өвтыя вотнә рәвәсләли, пәрхинам йөвәлли.

– Сәсар, лүват вәртә ур вәлл.

Панә ти ләвәла йәстәх:

– Қата, төм ай пәх тәхә выхиттән.

Ләвәлнә төм ай пәх төвә вухи. Панә йәстәл:

– Ма моқи йыснә йәхәм наркас йуққән, ның йуққән төй. Панә тәрмал пырнә манә лүваты пөны, ылэ чэвийәмал латнә. Төвә йәңклән, нөқ кәнчхәла. Панә, йәқәнам, лүв, қөты йәл лүвә? Төрәм Қон лүваты йәстәл төхә! Панә йәқәнам йистәхә йәх, панә йәқәнам мән. Йәқә, қутәла йөвәттахә йәхмала, сәм йәңкәл илэ мөңәттәх панә йәқә ләң. Ту имил йәстәл:

– Мүват, – мөттә, – атәннә мүв шир йәсәңат йәстә? Нәхмин тәхнам йүлән?

– Мүв тохи йиснәл мантәм йәстәл.

– Әнта, йисмин вәлэ йәқәнам йүвән. Йәқәнам ләнтахә йәхманнә, сәмхәла илэ мөңәтхәла. Тәтты та, сәм йәңкла!

Қувәр пәтә лүваты памтәтәх.

– Панә вәс ыл ләвнам мант китхийәл.



Хор: Сергей Русскин

Йәхәл қәләм латнә, мөттә, ның йуққәл, наркас йуққәл төвә пәнхәл. Тутхән кәнчхәхә мант китәл.

– Ну, қөты йәл лүвә Төрәм Қон йәстәх қунтә – қөты йәли! Йәңқа вәс!

Төппә ма кичәхәм әй күрәп ләпас вәра, өвәрхә.

Панә ту имил ләпасат вәртәх, өвәрхәәй қонәп қонтып ләпас. Панә төвә тәвәртәх. Панә мән. Имилнә сувәмат мәйи панә пәртәли. Сувәм вөймәли, панә ай пәрт пуләли. Панә ту пәрт пул өвтыя, панә сувәм вәймәли өвтыя ләққинт, панә итпә мәнәл. Әй тохинә мән, мән. Тәм мәх өнтнам вәс туминт. Ту вәс әй мәчхә ылнам. Ти туви, туви, әй латнә ти нәви тохия ти көрәх. Қәтлән-утлән төрәма ти көрәх. Төл сохит әй сарнам. Әй тохинә ләйләл: туминт чин мөқәп тохи.



Хор: Сергей Русскин

Күч йәмхә ләйәлтахә йәх – тәми қәнтәқ қө ти лөвәт-сөвәт төвөнә лөльәт. Панә төвнам әнтә әңкрәмтәх. Сарнам мән. Өс әй тохинә ләйхәләл: йәки пөмәң мөта, күнчәң пөмәң мөта төв лот ту. Төвнам күч әңкрәмтәх – тәми қәнтәқ қө өптәт. Панә сарнам мән, төвнам әнтә ләйләл.

Өс әй тохинә йахнә ти виҳли:

– Тәх олтәта, тәхнам әңкрәмта!

Төвнам күч әңкрәмтәх – ваһәм пәлкәт, һөл пәлкәт, лул пәлкәт.

Панә төвнам әнтә әңкрәмтәх, сарнам мәнәл. Өс әй тохинә мән, мән. Кат имихән-икихән әнәл очһи па қөнә па һәримтәли. Ту һәрәхләхән. Ләңктә қөл әнтә вулхән. Әссәңнам ләвәтләхән-пытләхән. Өс сарнам мәнәл. Өс әй тохинә кат имихән-икихән әй очһи пуләли лиңккән, көт лоңкәр лөвит очһи пул. Тутнат әлләхән. Тикин-микин кәм әнтә әт. Панә төл сохит сарнам мән, мән. Әй тохинә өс ләв лөльәл. Ту ләв панә... чайә, ту очһи имихән-икихәна йөвәтмал әй төхәнә, тәлилта қөйәхи мүв йәстәл: «Тит қәтлән-қөтлән төрәмнә вәлминнә, тит төм пәйләх ләвитмин-пытмин вөлхән, төм пәйләх атәмхә вөлхән. Тутәлнат тәнә итпә вәлл. Итпә әй ту йәмин-туһин туһләлхән».

Өс сарнам мән, мән. Ту имихән-икихәна йөвәт, ай очһи пуләли ими. Тәлилта қөйәхи мүвә йәстәх: «Тит қәтлән-қөтлән төрәмнә вәлминнә, йәмхә вөлхән. Нулнам атәм вәр өнтәм вөл, пыт көл, атәм көл. Итпә ту йәмин-туһин туһләлхән».

(Еллы па ул)

Аграфәна Сопочина нәпека ханшсаллы

Ими Хилы па Ялань пошах

(Олаң шупал № 27 луңталн)

Кимет хаталан Ими Хилы унта па ши манас. Вой калмат хуват шушал: ләңкар калтам ки уятал, ши калтам хуват шушал, шовар калтам ки уятал, шовар калтам хуват шушал. Щиты шуштал хуват худантал: ахой щикем увал. «Мандам, вантлэм, ахой щита увал?» – Ими Хилы нумасал.

Аялта курт пела шушмас. Вантлалды ун рәп хуват карты ухадан Меңк пошхие хататдыйл. Хатэмал, увалтал па няхалтал. Ям хув Ими Хилы шитаман лойс, щалта Меңк пошхан лув кашаласа:

– Юва, пидые, яха хататлидман!

– Каш ант тайдам! Ма вой велты мандам, кум ант шитдам.

– Юва, кушкепа йи пуш хатэмалдман.

Ими Хилы нэмолты ёхды ястаты ант верытас па хатэмиты номас верас.

– Юва, ухлэм нёда омпса. – Меңк пошах ястас.

– Анта, ма ёхды омасдам. Наң шеңк такан няхлан.

– Ма такан няхты ант питдам.

Ими Хилы ухад юпия катламтас па лын ши хатэмасчан. Ухадан мантан элты Меңк пошах щалта роман увалтас, Ими Хилы лап мантса, щёмлды ракнас. Ван-хув щиты одас, нох сайкапмал порайн вантлалды: Меңк пошах ухлад пидан рәп лоңда шушал.

– Пидые, наң па муя ил ракантсан?

Ими Хилы ястал:

– Ма ши ястасам: ма хататдыты наң пидэнан ант верытдам. Наң шеңк такан няхлан.

– Ма ин такан няхты ант питдам. – Меңк пошах ястал.

– Ма па хататдыты ант питдам. Вой велты манэм мосал, хатл ил ши питал.

– Я-а, илэм пуш хонна хатэмалдман. Ма шаншема омпса, ил ант ракандан.

Щикуш Ими Хилы ант даңхас хатэматы, па ши ухда омпсас.

– Я-а, омпса! – Ими Хилы ястал. – Ма наң юпенан омасдам.

Щиты ши лын хатэмасчан. Меңк пошах па ши увалтас па ши няхалтас. Ими Хилы па ши лап мантса па щах ракнас. Ям хув лув щиты одас па худал: Меңк пошах ястал:

– Я-а, пидые, наң нэш па ши хащмен?

– Наң щикем такан увдан: наң пидэнан хататдыты пищ антом.

– Йи пуш па хатэмалдман. Наң ин ухда омпса.

Ими Хилы ястал:

– Анта, наң пидэнан ма па ант хататдыдам! Ма манэма атәл ухдые вердам, наң утща хататдыя.

Ими Хилы лайм вус, сумтые ил пайтас па карад нох волькалды питсалды. Меңк пошах вантал: Ими Хилы даяман сэвармал, даймал мува хойл даяман па сэвармал, даймал па мува хойл.

Меңк пошах ястал:

– Щиты ешащман, хун па наң ухлән етшал? Наң ёдан, ухад верты нэман верам таха тайлан?



Хор: Любовь Возелова

– Ма ёдан имем ими нядам элты юх волькалдэм.

– Хоты па наң щиты волькалдэн?

– Ма щиты уталсам. Наң увты ши уталмен, ма ищи щиты уталсам. – Ими Хилы ястал. – Наң ид ода, ма па наң нядмен элты юх волькалды верытдам.

– Наң ма нялмем нох ант сэвармалэн?

– Ма ёшем муй дон ант тайл?

Меңк пошах щиты ши верас: ил, мува одас па нялмал ким талсалды. Ими Хилы юх шупал Меңк пошах нядам элты понтсалды па юх волькалды питсалды. Юх волькалтал-волькалтал па потартал:

– Ёдан удмеман, ма щиты верыдысам.

Ими Хилы юх шупал волькалсалды-волькалсалды па Меңк пошах нядам нох сэвармалды.

Атом туран Меңк пошах ши увалтас. Ими Хилы па лап мантса, щах ракнас. Олтад элты Ими Хилы потса, нох верлас па вантал: Меңк пошах нядам шупие керытдыйл. Меңк пошах па холпела манмал, туп манам вураң юшиел хащмал. Ими Хилы ши юш хуват ши манас.

Шушас-шушас, ун воша ёхтас. Иса наңк юх па худ юх элты верам хотат дойдат. Вураң юш хуват шушас па йи хот

пуңда ёхтас, хот лоңда хуңхас па идлы худантыйл. Меңк пошах эңалал. Аңкедан-ащелан инщасла,

– Наң па хоты йисан? Лув уңдал пела алял па молты ястаты вутщийл.

– Хоты па лув йис? – ахойн инщасла.

– Мана, яңха хот пуңадан улты пиращ ики хоща! – ищи тур сыйң хоят ястас.

Ахой нох доймтас па ши хухалмас. Ким этас па яка питас. Йи курал-йи курал адмидыйл, йи ёшал-йи ёшал алидыйл. Якал па арийл:

– Тыел-тохел якидыдам,

Тыел-тохел навратдыдам.

Веншман ки карэмидам,

Сакаң сэвем тарэмийл.

Шаншман ки карэмидам,

Сакаң сэвем тарэмийл.

Щиты хухлас-хухлас па амуй хота ши лоңас. Ими Хилы ил навармас па ши отән лоңам хот пуңда хухлас. Ов пуңадан худантман ши дойл.

(Елды па ул)

Любовь Возелова нэпека ләщатам монц



Хор: Любовь Возелова

Хоты кораль верда



Хор: Иван Сандрин



Хор: Иван Сандрин

Кораль – щит кадаңат похла акатты ураңна нэман лэщатты пушас. Щи онтасна кадаң тащат луңатты кеншак. Коральян дув портунан пондайт, яммалдайт па пал посан вердайт.

«Горковское» сельскохозяйственной предприятие худмет тащ хоца мет уншак хоят Владимир Егорович Максаров уд. Дув нядъяң молтас тал кадаң тащатан рупитас. Ин пенсияйн уд па похлад пидан холна Кевн яңхал. Хоты кораль верда, щит элты каматса ясаң ястас:

«Тамаш кораль муң хув пора элты верылыты питсув. Олңа, муй арат мосал, нэман лэщатам аңкал юх мува донщлталув, щалта па капрон сохмаң вошаман элты талдэв. Щи елпи муң жилковой вошаман мийдысаюв. Дув сора тохты питсат, щипан нох волдысайт. Юх кораль там муватан ант верыдыла, хота аршак ун юх энамал, щита уддыйл. Мет олңа, хун ма айшак усам, кадаңдув тынщаңан катадман луңтыдыслув. Щит шеңк рупатайц. Ин кораль щиран щикем ям».

Там йис удапса елды манал. Интернет хуват рупитты камн хошапат этсат. Кадаңдув ялап щир хуват палд посан пондайт. Молты порайн мосаң кораль верты па ант мосты питал. Похла ант акатман, спутник хуват араң щиран кадаңдув луңатты питдайт.

Иван Сандрин ханшам потар



Владимир Максаров мет ай Дарина хилыел пидан.



Хор: Иван Сандрин



Хор: Иван Сандрин



Хор: Иван Сандрин

Газета «ЛУХ АВТ»

Адрес редакции: 629003, ЯНАО, г.Салехард, мкр. Богдана Кнунянца, д. 1, каб. 106
+7 (34922) 4-68-63

E-mail: luh.avt@yamal-media.ru

Учредитель

Департамент внутренней политики Ямало-Ненецкого автономного округа (629008, ЯНАО, г.Салехард, пр-кт Молодёжи, д. 9, каб. 708)

Газета зарегистрирована

Управлением федеральной службы по надзору в сфере связи, информационных технологий и массовых коммуникаций по Тюменской области, ХМАО-Югре и ЯНАО 19 апреля 2012 года
Регистрационный ПИ № ТУ72-00558

Тираж 1300 Заказ 230 тз
Подписные индексы: на год – ПА700, на полугодие – ПР561

№ 28 (1331)

Газета вышла в свет 11 июля 2026г.

Подписано в печать 9 июля 2026г.

по графику: 16.00

фактически: 16.00

Газета выходит по субботам

Цена годовой подписки 88 руб., в розницу не распространяется

Издатель

Департамент внутренней политики ЯНАО (629008, ЯНАО, г.Салехард, пр-кт Молодёжи, д. 9, каб. 708)

Отпечатано в АНО «Ямал-Медиа»

Юридический адрес: 629003, Ямало-Ненецкий автономный округ, г. Салехард, мкр. Богдана Кнунянца, д. 1, каб. 106

Фактический адрес: 629007, Ямало-Ненецкий автономный округ, г. Салехард, ул. Чубынина, д. 39А

Генеральный директор АНО «Ямал-Медиа»

Зулинова Марья Андреевна

И. о. главного редактора Сандрин Иван Эдуардович